

<b>Zeitschrift:</b>	Igl Ischi : organ della Romania (Societat de Students Romontschs)
<b>Herausgeber:</b>	Romania (Societat de Students Romontschs)
<b>Band:</b>	75 (1990)
<b>Heft:</b>	2
<b>Artikel:</b>	La farcla la faultsch ed il bov : sur dalla diversitat dalla cultura grischuna el temps vegl
<b>Autor:</b>	Mathieu, Jon
<b>DOI:</b>	<a href="https://doi.org/10.5169/seals-881592">https://doi.org/10.5169/seals-881592</a>

### Nutzungsbedingungen

Die ETH-Bibliothek ist die Anbieterin der digitalisierten Zeitschriften auf E-Periodica. Sie besitzt keine Urheberrechte an den Zeitschriften und ist nicht verantwortlich für deren Inhalte. Die Rechte liegen in der Regel bei den Herausgebern beziehungsweise den externen Rechteinhabern. Das Veröffentlichen von Bildern in Print- und Online-Publikationen sowie auf Social Media-Kanälen oder Webseiten ist nur mit vorheriger Genehmigung der Rechteinhaber erlaubt. [Mehr erfahren](#)

### Conditions d'utilisation

L'ETH Library est le fournisseur des revues numérisées. Elle ne détient aucun droit d'auteur sur les revues et n'est pas responsable de leur contenu. En règle générale, les droits sont détenus par les éditeurs ou les détenteurs de droits externes. La reproduction d'images dans des publications imprimées ou en ligne ainsi que sur des canaux de médias sociaux ou des sites web n'est autorisée qu'avec l'accord préalable des détenteurs des droits. [En savoir plus](#)

### Terms of use

The ETH Library is the provider of the digitised journals. It does not own any copyrights to the journals and is not responsible for their content. The rights usually lie with the publishers or the external rights holders. Publishing images in print and online publications, as well as on social media channels or websites, is only permitted with the prior consent of the rights holders. [Find out more](#)

**Download PDF:** 30.07.2025

**ETH-Bibliothek Zürich, E-Periodica, <https://www.e-periodica.ch>**

# L F A R C L A L F A U L T S C H E I B O D V

Sur dalla diversitat dalla cultura grischuna  
el temps vegl

J O N M A T H I E U

In referat translataus dil tudestg da Gieri Venzin<sup>1</sup>

Anno 1654 miera a Glion il grond signur Hans Wilhelm Schmid da Grüneck, anteriu «Landrichter», mistral, cumissari e podestat. A sia sepultura perdeghescha il plevon detagliadamein (per buca dir liung e lad) sur dalla mort ed il maletg dalla mort. Ei la mort ina persuna sco quei che bia glieud crei, ni, sco quei ch'auters manegian, in spért? Daco vegn la mort malia-  
da senza carn e pial? Daco senza nas, senza egls ed ureglas? Daco tegn ella el maun dretg ina faultsch? Ni meinsvart era ina farcla? La salin, rispunda il plevon alla davosa damonda, seigi sco la carstgaunadad exponida alla malaura, «mo cur ella ei madira, scha ven la madonna cun sia farcla la meda giu, la portt en clavau, lau eis ella sagira.»

Daco — vegnis Vus a sedumandar — daco entscheiva gl'autur siu priedi agrar-

historic gest cun in plaid da bara? Che la mort, la madunza «par exellence», sa ir entuorn cun la farcla secapescha bein da sez. Quei savessen ins crer. Aschi clar e general ei quei denton buc. Cu la mort luvra-va ell'Engiadina, duvrava ella buca la farcla, mobein la faultsch, leu fuva ella in ver sitgur. En in saltar dils morts dall'entschatta dil 17avel tschentaner presenta ella ses uaffens cun ils suandonts plaids: «Mias armas chia dhe aint in maun / Eeis ünna fotsch fick agiüceda / Cun quela tschun tuotta braieda. . .» Ell'Engiadina surveva pia la «fotsch fick agiüceda» per segar ils moribunds che vegnevan dil reminent era maliai sco spigias. «Tschunker» manegiava numnadamein raccoltar il graun. Che la mort tagliava ella Surselva siu graun human cun la farcla ed ell'Engiadina cun la faultsch, muossa vi sin differentas meto-das da raccoltar il graun vegetal. Igl ei den-ton ualti difficultus da documentar quei punct cun solidas fontaunas historicas. Aunc pli difficultus eisi da declarar a moda plausibla quellas duas differentas tecnicas da raccoltar. Alla tscherca da raschuns pusseivlas stuein nus ir alla liunga. Nus vegnin buc mo ad observar farclas e faultschs, mobein bia auters elements dala veglia cultura purila. Denter auter era quels animals da lavur pacifics ch'ins vesa oz struschamein pli: ils bovs. Denton, schei entscheiver mei dall'entschatta. Entuorn ils 1910 han ils scienziai da lungatg dil Dicziunari Rumantsch Grischun fatg ina retscherca a scret cun l'intenziun da rimnar expressiuns localas per da tutt secturs dalla veta agrara. Ins ha era du-

mandau las expressiuns per «Getreide mähen oder schneiden», per la laver «des Absichelns» e per igl uaffen corrispudent, «die Sichel». Da quella retscherca ressorta ei ch'il Grischun romontsch fuva en quei punct partius en treis parts: ella Surselva fuva il meder cun la farcla fetg dera-sau; el Grischun central duvravan ins la farcla mo per ina part dils fretgs dils èrs, oravontut per il segal, ferton che la giutta pli robusta vegneva segada cun la faultsch; ellas vals orientalas, cunzun ell'Engiadina perencunter duvrava il pur mo la faultsch. In ni l'autra che legia quei text seregorda forsa dad atgnas observaziuns ed experientschas, sin fotografias pli veglias ein quellas tecnicas era vegnidas documentadas ualti savens. Quei che fa surstar dapli ei che quella partizun regiunala existeva, sco quei che nus savein, gia duront il temps digl «Ancien Régime», gie forsa perfin el 16avel tschentaner ni aunc pli baul. Pertuccar pertuccava ella naturalmein mo la cultura da garnezi, buc il far fein e pastg: lezs vegnevan da vegl enneu segai culla faultsch. Perquei saveva la mort meins-vart era purtar quei uaffen a Glion. Tgei fontaunas pli solidas e pli veglias date ei aunc en nossas regiuns per documentar il tagliar dil graun? Ellas monografias dils «patriots economics», ch'ein per regla pubblicadas el «Sammler», anflan ins differentas descripziuns dedicadas a nossa damonda. Dalla Cadi dat ei in mussament per il meder cun la farcla; in autur dil Sursés puntuescha la metoda mischedada e dall'Engiadina, oravontut da Ftan ch'ei vegniu descret minuziusamein, ha ei num

che buc mo la giutta vegnevi segada cun la faultsch, mobein era il graun d'atun. Pli lunsch el vargau van las fontaunas statutaricas, pia indicaziuns elllas leschas localas. Specialmein claras ein quellas el Grischun central. Ils statuts dalla dertgira Ausserbelfort, revedidas ils 1697, distinguant par-tentent ils dretgs da raccoltar denter la giutta ed ils «frücht, so mit der sichlen ab-geschnitten und ingesamblet werden, als da seynd rocken, weitzen, rauchgersten, bonen oder erbis.» Semegliontas allusiuns savessen ins era citar ord in contuorn pli vast, dil Sursés sur la Val d'Alvra entochen el Scanvetg. Sche nus vulein perscrutar nossa damonda aunc pli lunsch anavos vein nus pli e pli biars problems cun la do-cumentaziun. Ei deva paucs motivs da fixar caussas aschi semplas sin prezius pu-pi ni sin pergamenteina. La scartira era da quei temps aunc per gronda part la «Son-tga Scartira». Gest da quella sfera religiosa denton anflan ins differentas indicaziuns. Buc mo en priedis ni saltar dils morts ch'jeu vai zitau all'entschatta, mobein era ella bibla. Enconuschentamein deva ei ell'Engiadina dapi ils 1560 translaziuns ro-montschas da quella, ella Surselva dapi ils 1648. Igl uaffen el 5. cudisch da Moses 23,25, «aber die Sichel sollst du nicht schwingen über das Korn deines Näch-sten», ei per exempli vegnius translataus ella versiun sursilvana cun «farcla», en la la-dina denton cun «faultsch». Ils purs sursil-vans vessen — en la dispetta da meini cun ils promoturs dalla faultsch — saviu sere-ferir alla bibla, quei che capitava adina pu-spei en Svizra naven dil 18avel tschenta-

ner lls purs engiadines denton buc. Lur biblas menziuneschan buca la farcla, buc el Vegl e buc el Niev Testament, buc ell'emprema e buc en otras translaziuns.

El Grischun ha quella discussiun sur dallas tecnicas da raccoltar entschiet pér ell'emprema mesadad dil 19avel tschentaner e quei en connex cun emprovas da reformar l'agricultura. Ella «Historia de Gion actif», quella historia sursilvana d'in pauper fegl d'in pur che s'avonza, grazia a sia prudentscha e habilitad, al pur il pli bein-stont dil vitg, leu legian ins per exemplil suandont cussegli: Schei tagliar il graun cun

la farcla, quei ch'ei bia meglier che cun la faultsch; ils cuosts vegnan remunerai en abundonza. Igl autur da Sumvitg dat d'entellir che la sperdita da garnins seigi pli pintga sch'ins taglia il graun cun la farcla e che quei cumpenseschi beinmaneivel la lavur supplementara. In auter meini pubblichescha cuort sissu il president dall'un-un agricola a Cuera, Friedrich Wassali. El center da sia argumentaziun stat buc mo il quantum da graun raccoltau, mobein siu prezi, la habilitad da concuorer sin fiera. «Der Schnitt mit der Sichel kostet ziemlich mehr als mit der Sense», scriva Wassali



Ils 1921 fotografescha Paul Scheuermeier, in scienciau da lungatg ch'ei vegnius lunsch entuorn, a Sumvitg ina famiglia duront la raccolta da graun. — La donna meda cun la farcla, igl um ligia las monas. Suenter il meder vegnan las stublas dil graun segadas cun la faultsch.


1857, «weil er mehr Arbeitskräfte in Anspruch nimmt. Da es bei uns oft an diesen fehlt und zudem der Arbeitslohn höher ist als in Deutschland, müssen wir, um konkurrieren zu können, die Arbeit so einrichten, dass sie uns so wenig wie möglich kostet, also das Getreide mähen und nicht mit der Sichel schneiden.»

Aschia vegneva ei argumentau da quels onns en bia parts dall'Europa. Dapertut deva ei partidas per la farcla e da quellas per la faultsch che puntuavan mintgamai ils avantatgs da lur uaffen preferiu. Quantificiar quels exactamein savevan ins denton mo en paucs cass. Ins sa supponer che tagliar il graun cun la faultsch mava duas tochen quater gadas pli spert che cun la farcla. Da l'autra vart vevan ins suenter il tagl pli preschau e meins precaut cun la faultsch dapli lavur da far las monas e da metter quellas a mantun. Quei ulterior pass da lavur per schar madirar ora il graun fuva en quei cass pli necessaris. Per sminuir la sperdita da garnins tagliavan ins en general il graun aunc avon ch'el fuva madirs. Vus veseis, als dus uaffens corrisundevan dus sistems da raccoltar, aschia ch'igl ei grev da far ina bilanza precisa tgeinin che fuva il meglier. Aunc pli grev fuss ei da far ina vera bilanza dils cuosts e dil gudogn. Propi segira astgass mo esser la regla gia allegada: Il tagliar cun la farcla pretendeva gronda lavur e pertava ina buna raccolta, il tagliar cun la faultsch perencunter deva dameins lavur e pertava dameins fretg.

Quei meina nus denton buca bia pli lunsch. Pertgei, immediat setschenta la

damonda: Daco han ils purs da certas regiuns grischunas duvrau la farcla entochen el 20avel tschentaner, ferton che quels d'autras regiuns preferevan la faultsch e quei pli probablamein naven dall'entschatta dil temps modern, segiramain naven dil 17/18avel tschentaner? Sco Engiadines han ins secapescha immediat ina risposta. Dalla glieud da quella regiun sedi ei gie ch'ella patratgi a moda raziunala e che la lavur sperta seigi da vegl enneu stada a cor ad ella. Sco scienziau ein ins denton obligaus da buc prender memia serius da quels giudezis e pregiudezis e da cavar pli afuns. Nus stuein pia encuir las circumstanrias che savessen ver giu favorisau en differentas regiuns differentas tenutas enviers la tecnologia.

Per quei intent proponel jeu inaga dad osservar il cantun Grischun ord la perspectiva dad in utschi. La carta da Dufour e lu oravontut il detagliau atlas da Siegfried, ch'ei vegnius fatgs ella secunda mesadad dil 19avel tschentaner, muossan da regiun tier regiun considerablas differenzas ella structura da surbagheggiar. Sche nus prendein en egl per exemplu la Foppa, lu vesein nus gl'emprem inaga baghetgs in en l'auter, ils centers dils vitgs dallas singulas vischnauncas. Entuorn quels coxs ein spattischadas signaturas da baghetgs entochen si sut las alps. Ei setracta, sco nus savein tuts, da baghetgs agricols, dad aclas e da cuolms. Sche nus mein en direcziun ost e sid ed observein per exemplu il Sur-sés, lu muossa la carta tut in'altra situaziun. Cheu ei il terren entuorn ils vitgs practicamein senza signaturas, pér in toc



Igl atlas da Siegfried, la grond'ovra dalla cartografia sivzra dil tardiv 19avel tschentaner, muossa a nus differnts si-  
stems agrars dil Grischun ord la perspectiva d'utschi. — La carta dalla Foppa ei sursemnada cun signaturas da ba-  
ghetgs, in dils mussaments per fuomas da menaschi dezentralisadas. Tut in auter maletg muossa la carta da Ftan:  
il terren el contuorn dil vitg e si dad ault ha negins baghetgs, tuts il products stuevan vegni menai a casa.



naven dil vitg, ella zona dils cuolms e misses, registreschan ils cartografs dil 19avel tschentaner ina cuntrada sursemnada cun baghetgs. Sche nus consultein finalmein la carta dall'Engiadina, anflein nus aunc inagada tut otras circumstanzias. En biaras vischnauncas da quella vallada ei la zona entuorn ils vitgs entochen si els aults senza signaturas; cun excepziun dallas tegias d'alp deva ei praticamein buca baghetgs ordeifer il vitg.

Risguardond ils baghetgs agricols san ins pia distinguier treis tips: sistems decentrallisai sco en Surselva, nua ch'ils baghetgs ein situai sur l'entira surfatscha che vegneva cultivada intensivamein; lu sistems miez-centralisai sco el Sursés, nua ch'ei dat mo en zones periferas baghetgs agricols; ed ils sistems centralisai sco en pliras vischnauncas dall'Engiadina, nua che tut ei concentrav el vitg. Jeu vegn strusch a stuer explicar ch'ina tala classificaziun ei da caracter ideal. Ella sa gidar a surveser e classificar constellaziuns ch'ein en realitat bia pli cumplicadas e variablas. En entgnas valladas reussescha quei mender, en otras meglier. In sistem agrar fetg decentralisau, forsa insumma il pli tipic, muossan las cartas da Siegfried ed outras fontaunas dil 19avel tschentaner per exemplu ella Purtenza.

En vesta a quels fatgs setschenta naturalmein la damonda da cura che quellas differenzas dateschan. Han quellas da far en zatgei cun midadas pli novas ni setracta ei dad ina veglia constanta dalla cuntrada grischuna? Avon ils 1850 dat ei buca cartas geograficas precisas, pia ston ins encurir

auters documents. Jeu vi numnar en quest liug mo duas gruppas da fontaunas orda differents temps. Entuorn ils onns 1800 informeschan — puspei inagada — las numerusas descripziuns el vegl e niev «Sammler», quella periodica dils economis ch'ei era enconuschenta ordeifer il cantun. Sur dil Sursés legian ins per exemplu il suandon: «Die Ställe stehen in den Dörfern, und nicht auf den Gütern zerstreut, daher fährt man das Heu auf die Ställe, und nur in den Maiensässen und Heubergen wird es getragen.» Igl autur, in Peterelli, descriva in stistem miez centralisau ed indichescha el medem temps las tecnicas da transport corrispondentes: Els cuolms, nua ch'ils baghetgs eran sils praus ni damaivel da quels, purtavan ins la raccolta si dies en clavau; ella zona dil vitg cun sias distanzas pli liungas vegneva quella menada cun vehichels. Semeglionts raports enconuschein nus era dad otras regiuns. Ella Purtenza descrivan els detagliada mein sco darar las structuras decentralizadas da leu, ell'Engiadina raquentan els dalla centralisaziun dils menaschis purils. Quella marcanta differenza denter las regiuns dil Flüela vegn dil reminentia indizada en descripziuns pli veglias, per l'emprema gada tier Durich Chiampell en sia topografia retica che datescha dils ca. 1570. Per il 16avel tschentaner lein nus denton trer neutier otras fontaunas. Co las parcellas eran surbaghegiadas duessen ins saver intervegnir dallas descripziuns dils beins ch'ins fageva a caschun d'ina vendita, d'ina debitaziun ni d'ina ierta. Jeu hai fatg en quei connex in per emprovas

da controlla. Dall'Engiadina aulta e dalla Bregaglia existan specialmein bia protocols notariais. Quellas duas valladas vean ina tradiziun da canzlia fetg semeglionta, lur structura agrara denton era dil tuttafatg differenta. Quei muossan gia quels protocols dil 16avel tschentaner. Ella Bregaglia numnan els ina massa da differents baghetgs economics ordeifer ils vitgs. Adina puspei legin nus dad in pratum cum mansione, cum tablato oder cum horreo, ferton ch'ils cudaschis notariais dall'Engiadina aulta descrivan mo praus ed èrs, senza discuorer da baghetgs. All'entschatta dil temps modern vegneva cheu pia l'entira ni bunamein l'entira raccolta menada a casa el vitg. Cun quels exempels less jeu buca pretender che la cuntrada agrara eri la medema sco dil temps digl atlas da Siegfried. Certs tratgs marcants eran dentongia lu sviluppai. Il different grad da centralisaziun dils menaschis purils para dad esser staus per ina buna part ina ierta dil temps mediaval.

Quei ein constataziuns pulit impurtontas. Ei sectracta gie buc dad ina caussa formala, cartografica, mobein da differenzas fundamentalas ch'eran colligiadas cun modas specificas da lavur e da viver, cun tecnologias specificas e cumposiziuns dils muvels e cun bia outras caussas sper l'agricultura. Lein inagada s'imaginar il calender da lavur dad in pur el nord dil grischun, en Sur-selva ni ella Purtenza. La stad e gl'atun pertava el siu fein e siu graun els baghetgs spatitschai per ses funs e quei per regla senza pli gronds agids, auter ch'in bien dies. Quella sempla tecnologia da trans-

port era per distanzas cuortas sperta e bienmarcau. Naven digl atun entochen la primavera stueva el duvrar si quels products starni pils baghetgs, perver or la biestga, dislocar da temps en temps, scuder il graun, vegin a casa cun latg e graun etc. Singuls commembers della famiglia, meinsvart l'entira famiglia, vevan pia dad ir envi e enneu, da purtar rauba ni catschar il muvel. La lavur da transport era buc fetg gronda, era la grascha era gie el dretg liug, persuenter era la prestaziun da marschar considerabla. En in sistem centralisau sco ell'Engiadina fuva la situaziun in'autra. Leu vegneva la famiglia darar spartida, ei deva pia dameins renunzias ed era dameins libertads. Il transportar fuva relativamein impurtonts, il marschar relativamein limitaus. Duront il temps da raccolta ch'era en mintga cass surcargas da lavur, stueva aunc tut veginir menau a casa. D'unviern vevan ins persuenter pli lev. Il muvel fuva el liug. Mo la grascha stueva veginir menada sils funs, gliez denton savens ualts lunsch.

Jeu hai duvrau anson la carta da Siegfried dalla fin dil 19avel tschentaner per entrar ella descripziun dallas structuras agraras. Cunquei che quellas structuras eran colligiadas cun differents basegns da transport, stuessen ellás era resortir dallas dumbraziuns da biestga dils 1866, 1876 etc. Ellas regiuns centralisadas stuessen nus teoreticamein anflar bia animals da lavur, bovs e cavals, ellás cuntradas decentralisadas denton mo paucs. Quei ei ussa veramein il cass. Tenor las dumbraziuns da biestga sereparta il diember da quels



Ils 1774 ha Martin P. Schmid da Ftan dessignau alla moda dils calendaris las lavurs purilas el decuors digl'onn. Cheu vesan ins la tecnica da raccoltar il fein (1. segar, rasar ora, 2. cargar sil car, 3. tragliun) e per il graun d'atun (4. segar, prender si, 5. poppas, car, 6. scuder). La faultsch vegn duvrada era per la raccolta dil graun; igl um sega, la dunna fa la «dozunza».

malulivamein: El nord dil Grischun, ora-vontut ella Surselva ed ella Purtenza cun Tavau e Scanfetg han ins dumbrau paucs animals da lavur, il medem vala era per las valladas dil sid; el Grischun central pli biars ed aunc pli biars ell'Engiadina. Els circuits

sursilvans Glion e Lumnezia deva ei per exempl 35 respectivamein 31 tocs per 1000 persunas, els circuits engiadines Suttasna e Ramosch muntan las cefras corrispondentas a 178 resp. 200, 5 tochen 6 gadas dapli. Sche in autur ch'ei burgheis da

Ramosch scriva a Vus da quellas caussas suera quei forsa dad in patriotissem local. Aschi sempel eisi denton buca. L'Engiadina veva numnadamein buca pli gronds muvels che la Surselva, mobein auters: ils animals da lavour, cunzun ils bovs, vevan bia dapli spazi en quels.

Ord la vesta historica fuss ei era sbagliau da valetar quella agricultura centralisada sco in'agricultura raziunala ni schizun moderna. Bein vesein nus dapi generaziuns ch'ils purs ellas regiuns decentralisadas concentreschan pli e pli lur menaschis e ch'els baghegian sche pusseivel ina gronda stalla centrala e drovan persuenter buca pli ils numerus baghetgs spatitschai pils funs. Quella midada ei vegnida favorisada da differentas circumstanzias, buc il davos dalla motorisaziun dils mieds da transport e dils basegns ed ils cuosts da baghegiar che creschan ad in crescher. Sche nus cumparegliein quels dus sistems el temps historic, avon ils 1850 ni 1800, stuein nus denton s'imaginar in auter context. Ei deva lu buca cars per cargar il fein e buca firmas da baghegiar. En verdad eran ils intellectuals da quell'epoca buca perina tgei system che seigi il pli effizient. L'emprema emprova a scret da giudicar quels sistems ha tenor miu saver Nicolin Serehard fatg, in plevon dalla Purtenza da derivonza ladina. En sias descripziuns dils 1742 enumerescha el ina retscha dad avantatgs e disavantatgs che caracteriseschan tenor siu meini l'agricultura dallas differentas valladas. Simpatia veva el plitost per il system decentralisau dalla Purtenza. Aschia puntuava el ch'ils purs dallas regiuns vi-

schinias stoppien menar «mit Unstatte» graun e fein a casa e la grascha sils funs. Denter ils auturs dalla Purtenza che han scret entuorn ils 1800 davart la medema damonda, dat ei gia da quels ch'argumentavan per la centralisaziun, auters selimitavan al pesar giu precautamein ils avantatgs e disavantatgs. Pér ils agronomi moderns dil 19 e 20avel tschentaner stean en pli engaschadamein per la centralisaziun. Els stuevan gie era considerar autres condiziuns generalas.

Nus stein pia avon ina situaziun fetg semeglionta a nies problem dalla farcla e dalla faultsch ch'ei bunamein ius en emblidanza. Nus vein in proceder tecnologic ni in ensemble tecnologic ch'ei s'expandius per cuort temps ni per pli ditg el mund industrialisau dil 19/20avel tschentaner. Inaga eisi la faultsch per la raccolta da graun, inaga la centralisaziun dils menaschis purils. Sche nus projectein anavos quei success modern el passau, savein nus morubigliar il frunt: Daco han certas valladas mantenui aschi ditg lur isonzas «antiquadas», malgrad che quellas «modernas» existean en auters loghens gia dapi tschentaners. Cheu ei — jeu ditgel quei buc senza esser loschs — il historiograf dumandaus. El sto denter auter mussar che l'optica contemporana sa savens buc mussar tgei ch'ei antiquau e tgei ch'ei modern. Tgi da Vus sa dir oz cun segirtad schebein l'energia atomara vegn ad esser a liunga vesta ina tecnologia dominonta ni sch'ella vegn forsa a menar nus en ina via tschocca? Quei vegn a depender da bia circumstanzias. Igl ei pia grev da decider schebein

ils Franzos cun lur program da baghegiar vinavon ovras atomaras vegnan a mante-  
ner raschun, ni forsa tuttina ils Austriacs cun lur decisiun da desister da talas. E sch'ils ins mantegnan egl avegnir buc ra-  
schun vul quei aunc ditg buca dir ch'els seigien stai pli tups che tschels. Els han de-  
cidiu sut outras circumstanzias economi-  
cas e socialpoliticas.

Tier la veglia tecnologia agrara grischuna setractava ei denton buc dad ina caussa talamein brisanta (cumperegliaziuns hi-  
storicas han gie per regla in pei zieg ni  
dus), las condiziuns generalas denton eran  
gia lu impurtontas, forsa schizun pli  
impurtontas. Ils purs vevan en bia damon-  
das buc grondas letgas. In pur dalla Pur-  
tenza saveva buca decider dad in di sin  
l'auter da copiar il sistem da menaschi da  
ses enconuschents dall'Engiadina. L'entira  
infrastructura dallas vischnauncas ch'era  
vegnida sviluppada el decours da tschen-  
taners, las reits da vias, ils dretgs da pascu-  
lar etc., eran gie colligai stretgamein cun  
ils singuls tips d'agricultura. Plinavon era il  
temps avon l'industrialisaziun buc fetg  
aviarts per innovaziuns. Sch'ina tala era  
buc exnum necessaria ni fetg avantagiusa  
stevan ins pli bugen tier il vegl. E schebein  
ina novaziun veva avantatgs decisivs, gliez  
dependeva lu puspei dallas circumstan-  
zias.

Quei vesan ins fetg bein vid igl exempl  
dils paners ch'ins metteva oravontut da  
malaura sin ils funs e cargava sissu il fein,  
per che quel smarscheschi buce sechi me-  
glier. Ils paners vegnan numnai el Gri-  
schun per l'emprema gada anno 1742 per

la Val da St. Antönien. Ins suppona che quels seigien vegni surpri cuort temps avon dalla vischinanza austriaca. Ento-  
chen ils 1800 sederasan quels en ils biars dils vitgs dalla Purtenza ed a Tavan, ualti segir entras ils contacts denter la popula-  
ziun purila. Cunquei ch'ils reformaturs dall'agricultura cussegliavan quels a scret  
gia ils 1779, ha ei giu dau ina discussiun en cerchels dall'intelligenza grischuna. Ils  
avantatgs da quels punto independenza dall'aura ed augmentaziun dalla raccolta eran clars. Criticau vegneva la lavur supplementara. Oravontut el Grischun central ed ell'Engiadina manegiavan ins ch'ils paners seigien plitost adattai per regiuns cun bia baghetgs spatitschai sco per exempl per la Purtenza. En lur valladas stoppien ins transportar vi e neu quels memia lunsch. «Der Heinzen kann man sich hier nicht bedienen», scriva in plevon dall'Engiadina aulta che veva aschiglioc ina tenuta progressiva, «weil ihre Behandlung in solchen Gegenden, wo die Ställe nicht auf den Güter stehen, allzu umständlich wäre.»

Suenter quei citat s'avischina nossa via circumstanziosa a sia fin. Cun in plaid da bara havein nus entschiet, suenter havein nus anflau ina cuntuaziun cun farclas e faultschs, lu vein nus observau sistems agrars per finalmein arrivar tier ils paners. Jeu hai emprau da mussar agl ur da quella via sin in per problems cun ils quals la perscrutaziun historica ei confruntada. Ils problems dallas fontaunas dad ina vart e da l'autra vart las difficultads teoreticas. Jeu sperel, suenter quellas explicaziuns,

che Vus spetgeies buca da mei ina risposta completa alla damonda dalla farcla e dalla faultsch. Ei vegn a ver dau bia raschuns sch'ins applicava differentas tecnicas da raccolta, sch'ins medeva en ina vallada tut il graun, en in'autra mo il graun d'atun, e sch'ins mo segava en ina tiarza. La raschun principala daco ch'ils purs han gia baul mess dalla vart la farcla che deva dapli lavur e che purtava denton dapli fretg, ei, tenor miu mein, il diember dils bovs che vegnevan teni. Quella relaziun selai illustrar il meglier ell'Engiadina bassa, ina regiun cun — per aschidadir — relaziuns extremas. Cheu segavan ins gie perfin il graun d'atun sensibel cun la faultsch maltscheca. E plinavon era quei la regiun cun ils pli biars bovs. Las muntaneras da bovs eran aschi grondas perquei ch'ils menaschis centralisai duvravan menadira, lu era, perquei ch'ils «bouvs» eran avanzai ad in artechel d'export dall'Engiadina bassa e finalmein, perquei ch'ins veva relativamein bia segal. Pertgei per perver quels duvravan ins strom. E cun quei sesiara il cerchel. Cun la faultsch segavan ins numnadamein buc il graun sin l'altezia dalla schanuglia sco cun la farcla, mobein «dem Boden nach», sco ei stat secret expressivamein en ina fontauna dils 1807. Cun auters plaids: la sperdita da raccolta e da vivonda per il carstgaun caschunada cun segar il graun cun la faultsch vegneva pli u meins compensada entras il gudogn da vivonda per ils animals. Persuenter stuevan ins gunder pli intensivamein ils uauls. Dapli ch'en auters loghens eran ins numnadamein dependents da stiarner guilas. La biestga

saveva gie buc scher sil strom, sch'ella stueva magliar quel.

Jeu desistel da tschintschar dad outras regiuns europeicas, nua ch'ins sa mussar semegliontas relaziuns denter la cumposizun dil muvel ed il svilup tecnologic el temps medieval tardiv ni all'entschatta dil temps modern. Ina relaziun less jeu denton aunc allegar alla fin: «Cur (la salin) ei madira, scha ven la madonna cun sia farcla le meda giu, la portt en clavau, lau eis ella sagira.» Quella passascha citada ord il priedi da Glion, che nus vein empriu d'enconuscher all'entschatta, numna buc casualmein la dunna che meda cun la farcla. La farcla era en general in uaffen feminin. Era sch'ins saveva en nos pigns menaschis buca sparter exactamein la lavur digl um da quella dalla dunna, reglas deva ei tuttina e sche pusseivel vivevan ins suenter quelas. Che la faultsch fuva igl uaffen digl um e la farcla quel dalla dunna vesan ins fetg clar el Grischun central, nua che omisdus uaffens existevan. Tgei consequenzas sociales veva ei denton sch'ins mo segava en ina vallada ed en in'autra mo medeva? Dalla Surselva vegn rapportau che las dunnas che vevien la responsabladad per ils èrs vegnevien savens al cunfin da lur forzas. Vean las Engiadinesas pli lev? Ellas savevan buc selamentar dil buordi dalla farcla, persuenter stuevan ellas sco «dozunzas» (quella che prendan si da plaun) ir davos igl um che segava si dretg e rutinadamein, ellas stuevan star giudavon e prender si da plaun ils canvaus.

Jeu surlasch allas lecturas da decider tgei situaziun ch'ellas vessen preferiu.